

## Concertsrees an d'Champagne

An deene leschte Joren hat d'Musek aus dem Rollengergronn scho méi dacks d'Geleeënheet, sech am Ausland ze presentéieren. No flotte Concertsreesen op Baden-Baden 2010 wou mir an der Konzertmuschel virum Kurhaus duerfte spillen an op Paräis 2013, mat engem Concert am Jardin du Luxembourg a superschéinem Wieder, war eist Zil dëst Joer d'Champagne.

Mat engem Doppeldeckerbus vun der Firma Demy Cars a gudder Laun goug et samschdes moies, de 14 Mee, ganz fréi lass. De Stopp mat Kaffi op der Autobunn huet schonn erahne gelooss, dass mir alleguer mat e puer Gramm méi op de Rëpper erëm géingen heemfueren !



Mee och d'Drénke koum natierlech net ze kuerz, well eis éischt Aktivitéit war, wéi kéint et och anescht sinn, eng Besichtigung vun enger Schampes-Kellerei, der Kellerei Mercier zu Epernay, wou et androcksvoll mam Lift 30 Meter

an de Keller gaangen ass. Während der Fahrt an d'Häerz vun der Kellerei konnte mir am Panorama-Lift schéi beliichte Szene kucken, déi ee vergiesse gelooss hunn, dass een esou déif ënnert de Buedem gefuer ass. Ustrengen hu mir eis och duerno net missen, well mer mam Zichelchen duerch déi laang Gäng gefouert gi sinn an dobäi déi néideg Erklärunge kruten.

No der Degustatioun war et dunn un der Zäit, an den Hotel ze fueren, an et muss ee soen, de Suite Hotel Novotel zu Reims war eng super Adress.

Sonndes moies dunn hu mir eis opgemaach fir den eigentleche Grund vun eiser Rees. Jo, mir haten deen net vergiess, och wa ronderëm iwverall mat Schampes gelackelt gouf !



De Concert zu Epernay op der Place Bernard-Stasi huet eis du och richtig Spaass gemaach. Eng flott Plaz mat vill Duerchgangsverkéier vu Foussgänger, déi gären eng Zäit laang stoe bliwwe sinn, fir sech ënner anere gutt

bekannte Stécker wéi „La môme Piaf“ oder „Les parapluies de Cherbourg“ unzelaschteren a matzesangen.

E puer falsch Noute goufe frëndlecherweis vun engem Velomoto iwverdeckt, dee vun Zäit zu Zäit laanscht eis gerattert ass, mee ganz éierlech, mir haten de Mann mat senger

Knaddermaschinn net extra dofir engagéiert !

Nom Concert huet et geheescht, jiddereen eng Hand mat upaken ! Schnell d'Perkussioun, d'Instrumenter an d'Pulter an de Bus, wien d'Uniform ausdoen a sech bequem undoe wollt, hat Pech, deen huet sech eben am Bus musse ploen. Mir hunn nämlech mat Zäit zu Cumières musse sinn, wou mer eng gemittlech Croisière-Déjeuner geplangt haten.



Gemittlech an ënnerhalsam war dës Croisière fir eis vun der Musek bestëmmt, mee déi Dose Leit, déi schonn um Schëff war a sech drop gefreet hat, hir Kollegin gemittlech an d'Pensioun ze schécken, huet wahrscheinlech misse

schlécken, wéi eisen Doppeldeckerbus 70 Leit ausgelueden huet. Mat der Rou um Schëff war et dunn eriwwer...

Eise ganze Respekt gëllt eisem Buschauffer, dee säi Risegefier - mat Unhänger ! - bravouréis duerch déi enk Stroosse bugséiert huet !

Nodeems mir du gutt gelaunt vum Schëff erof ware, si mir, zur Ofwiesselung, alt mol nach eng Schampes-Kellerei besiche gaangen, dës Kéier bei engem méi klengen Wënzer zu Cumières, deen awer eng grouss Degustatioun geplangt hat, vun där natierlech och laang profitéiert gouf.

Et versteet sech vum selwen, dass dunn och e puer Këschte vun där beschter Drëps mat op

Lëtzebuerg gongen, d'Plaz  
am Bus war dofir schonn  
am Virfeld eidel  
gelooss ginn !



Den Owend hu mir gemittlech zu Reims ausklénge  
gelooss, jidderee sou, wéi et ëm gefall huet,  
muenchereen hat no engem mëssgléckte Besuch  
an enger Karaoke-Bar dann awer nach eng Plaz  
fond, fir mat de Kollegen e flotten Owend ze  
verbréngen.

Nom Kaffi méindes moies hu mir eis dunn erëm op  
den Heemwee gemaach, mat engem Tëschestopp  
an engem ganz heemleche Familljerestaurant,  
wou mir nach eng Kéier sou richtig verwinnt  
goufen. Mat enger Besichtigung vum Musée de la  
Vigne am Phare de Verzenay gong eis Rees dunn  
op en Enn.

Et war mat Sécherheet eng vun deene  
flottste Concertsreesen, déi d'Musek gemaach  
huet. Jidderee war déck zefridden, ausser vläicht  
dee Musikant, deem seng Uniform op  
onerklärlech Aart a Weis verschwonnen ass...  
mee e bëssche Verloscht ass jo ëmmer an dat ass  
wuel déi Anekdot, iwwer déi mir och an zéng Joer  
nach wäerte laachen.

Obwuel ... sou richtig eriwwer war eise  
Päischtweekend jo nach net, well de nächsten Dag  
gong et moies fréi erëm lass, wéi säit  
Joerzénge op eis Sortie op d'Iechternacher

Sprangprëssessioun, déi mat engem gudde Bréitchen a Kaffi ugefaangen huet a mat engem gudden Iessen zu Bech am Restaurant Steinmetz an enger geselleger Partie Keelen opgehale huet.

Alles an allem véier superschéin Deeg ënner Kollegen !

E grouse Merci un d'Firma Demy Cars an eise Komitee fir d'Organisatioun vun dëser Rees, dem Komitee, der Amicale, eiser Kantinsequipe, eise Musikanten, Frënn, Bekannten a Familljememberen, déi duerch hiren onermiddlechen Asaz iwwert d'ganz Joer dofir suergen, dass genuch Geld an der Kees ass, fir all puer Joer sou eng schéin a geselleger Rees, déi och der Komerodschaft ëmmer erëm gutt deet, kënnen ze maachen.

Mir freeën eis op déi nächst Concertsrees !!



